

Վարչական տույժ նշանակելու մասին

«10» մայիսի 2022թ

ք. Սիսիան

Ես՝ Հայաստանի Հանրապետության պետական եկամուտների կոմիտեի Հարավային մաքսատուն-վարչության պետի ԺԹՊ Արտաշես Ղամբարյանս, քննելով «ԲԵՍՏ ՖՐՈՒԹՍ ԱՄ» ՍՊԸ-ի տնօրեն Ալեքսանդր Ռաֆիկի Մալխասյանի (նույն.քարտ՝ 004860359, ք.Երևան, Մալաթիա-Սեբաստիա, Ծերենցի փողոց, տուն 24) կողմից մաքսային կանոնների խախտում կատարելու վերաբերյալ նյութերը,

Պ Ա Ր Զ Ե Ց Ի

04.03.2022 թվականին «ԲԵՍՏ ՖՐՈՒԹՍ ԱՄ» ՍՊ ընկերությանը պատկանող 14,100 կգ «մարտի 1-ից մինչև ապրիլի 30-ը, ԹԱՐՄ ՎԱՐՈՒՆԳ» նկարագրությամբ ապրանքի համար լրացվել է թիվ 05100041/040322/0000273 ապրանքների հայտարարագիրը: ԵՏՄ-Իրան ժամանակավոր համաձայնագրի շրջանակներում պետք է կիրառվեր մաքսատուրքի արտոնություն՝ 15 տոկոսի փոխարեն գանձվեր 11,3 տոկոս: Ապրանքների հայտարարագրի 36-րդ սյունակում նշում չի կատարվել, քանի որ CT-3 տիպի ծագման հավաստագիրը չի ներկայացվել, որի արդյունքում կիրառվել է 15 տոկոս մաքսատուրք: Վերոնշյալ ոչ ճշգրիտ տեղեկությունը ներկայացնելու արդյունքում մաքսային վճարներ չեն առաջացել:

Նշված փաստի առթիվ ՀՀ ՊԵԿ ՀՄՎ ՄԳ բաժնի գլխավոր մաքսային տեսուչի կողմից 04.04.2022 թվականին հարուցվել է մաքսային կանոնների խախտման վերաբերյալ վարույթ՝ ՀՀ մաքսային օրենսգրքի 203-րդ հոդվածի հատկանիշներով, այն է՝ Հայաստանի Հանրապետության մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվամբ հայտարարագրելը կամ հայտարարագրման ժամանակ ոչ ճշգրիտ տեղեկություններ նշելը:

Ալեքսանդր Ռաֆիկի Մալխասյանը փոստով պատշաճ ծանուցվել է գործի քննության վայրի և ժամի մասին, սակայն չի ապահովել է իր մասնակցությունը գործի քննությանը:

ՀՀ ՊԵԿ Mulberry փաստաթղթաշրջանառության համակարգի միջոցով «Օլ ին բլոկ»

ՍՊԸ-ի տնօրեն Հակոբ Բադալյանը գրավոր բացատրություն է ներկայացրել առ այն, որ 04.03.2022 թվականին CT-3 տիպի ծագման հավաստագիրը չի ներկայացվել, քանի որ Իրանի Իսլամական Հանրապետությունում այդ օրը ոչ աշխատանքային է: 05.03.2022 թվականին ներկայացվել է թիվ 1812203050091 առ 05.03.2022 թվականի CT-3 տիպի ծագման հավաստագիրը: Ուստի, Հ.Բադալյանը խնդրել է, գործի քննությունը կարճել, քանի որ առկա չէ մաքսային կանոնների խախտումը վկայող որևէ հանգամանք:

Համաձայն «Օլ ին բլոկ» ՍՊԸ-ի և «ԲԵՍՏ ՖՐՈՒԹՍ ԱՄ» ՍՊԸ-ի միջև /ի դեմս տնօրենների/ 26.04.2019 թվականին կնքված թիվ B26/04/19 ծառայությունների մատուցման պայմանագրի 2.2.1 կետի պատվիրատուն պարտավոր է՝ ապրանքների մաքսային հայտարարագրման ծառայությունների մատուցման համար Կատարողին ներկայացված փաստաթղթերում ապրանքի վերաբերյալ չարտացոլված կամ ոչ պատշաճ նկարագրված կամ կասկած առաջացնող տեղեկությունների առկայության դեպքում **Կատարողին ներկայացնել հավաստի և լիարժեք տեղեկություններ**՝ բեռի պարունակության, ապրանքների անվանումների, նկարագրի, բնութագրի, համապատասխան արժույթներով արտահայտված արժեքների, քաշի, քանակի, տեղերի քանակի, փաթեթավորման տեսակի ու ձևի, **ծագման երկրի** և մաքսային հսկողության ու մաքսային ձևակերպումների համար այլ անհրաժեշտ տվյալների վերաբերյալ:

Վարչական իրավախախտումների վերաբերյալ ՀՀ օրենսգրքի 279-րդ հոդվածի համաձայն՝ վարչական իրավախախտման վերաբերյալ գործը քննելիս /պաշտոնատար անձը/ պարտավոր է պարզել՝ կատարվել է, արդյոք, վարչական իրավախախտում. արդյոք տվյալ անձը մեղավոր է այն կատարելու մեջ. արդյոք, նա ենթակա է վարչական պատասխանատվության. կան արդյոք պատասխանատվությունը մեղմացնող և ծանրացնող հանգամանքներ:

Վարչական իրավախախտումների վերաբերյալ ՀՀ օրենսգրքի 245-րդ հոդվածի համաձայն՝ վարչական իրավախախտումների վերաբերյալ գործերի վարույթի խնդիրներն են՝ յուրաքանչյուր գործի հանգամանքները ժամանակին, համակողմանիորեն, լրիվ և օբյեկտիվորեն պարզելը, գործը օրենսդրությանը ճիշտ համապատասխան լուծելը (...):

Ղեկավարվելով վերոնշյալ իրավանորմերով, թիվ B26/04/19 ծառայությունների մատուցման պայմանագրի 2.2.1 կետի և «Օլ ին բլոկ» ՍՊԸ-ի տնօրեն Հակոբ Բադալյանի ներկայացրած բացատրության համադրված ուսումնասիրությունից ակնհայտ է, որ «ԲԵՍՏ

ՖՐՈՒԹՍ ԱՄ» ՍՊԸ-ի տնօրեն Ալեքսանդր Ռաֆիկի Մալխասյանը պարտավոր էր կատարել պայմանագրով ամրագրված իր պարտավորությունները, այդ թվում տրամադրել **ծագման երկրի վերաբերյալ հավաստագիրը**, որպեսզի «Օլ ին բլոկ» ՍՊԸ-ն հնարավորություն ունենար ճշգրիտ լրացնել ապրանքների հայտարարագիրը:

Եվրասիական Տնտեսական հանձնաժողովի 20.05.2010 թվականի № 257 որոշման համաձայն /15.02.2022 թվականի խմբագրությամբ/ ապրանքների հայտարարագրի 36-րդ սյունակում /առանձնաշնորհումներ/ ըստ մաքսային վճարի յուրաքանչյուր տեսակի պետք է նշվի համապատասխան ծածկագիրը՝ մաքսային վճարների վճարման արտոնությունների դասակարգչին համապատասխան՝ 2-րդ տարր՝ ըստ մաքսատուրքի:

ՀՀ մաքսային օրենսգրքի 189-րդ հոդվածի համաձայն՝ մաքսային խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

Վարչական վարույթի նյութերի ուսումնասիրությունից պարզվում է, որ թիվ 05100041/040322/0000273 ապրանքների հայտարարագրի 36-րդ սյունակում ներկայացվել է ոչ ճշգրիտ տեղեկություն, որն էլ հանգեցրել է ՀՀ մաքսային օրենսգրքի 203-րդ հոդվածի 1-ին մասով սահմանված մաքսային կանոնների խախտման: Ընդ որում, կատարվածի արդյունքում չի առաջացել մաքսային վճարների պակաս հաշվարկում կամ չհաշվարկում, ինչպես նաև ոչ սակագնային կարգավորման միջոցների չկիրառում:

Ելնելով վերոգրյալից և ղեկավարվելով ՀՀ մաքսային օրենսգրքի 203-րդ, 206-րդ, 221-րդ հոդվածի 1-ին կետի ա) ենթակետով և ՀՀ վարչական իրավախախտումների վերաբերյալ օրենսգրքի 32-րդ ու 234-րդ հոդվածներով,

Ո Ր Ո Շ Ե Ց Ի


1. Ալեքսանդր Ռաֆիկի Մալխասյանին ՀՀ մաքսային օրենսգրքի 203-րդ հոդվածի 1-ին մասով սահմանված մաքսային կանոնների խախտում կատարելու համար ենթարկել վարչական պատասխանատվության՝ տուգանել **50000 ՀՀ դրամ**:

2. Որոշման մասին հայտնել Ալեքսանդր Ռաֆիկի Մալխասյանին:

3. ՀՀ մաքսային օրենսգրքի 221-րդ հոդվածի 2-րդ մասի համաձայն որոշումն ուժի մեջ է մտնում այն կայացնելու պահից և համաձայն ՀՀ մաքսային օրենսգրքի 222-րդ հոդվածի 2-րդ մասի որոշումը կարող է բողոքարկվել վերադաս մաքսային մարմին (պաշտոնատար անձին) որոշումը կայացնելուց հետո՝ 10 օրվա ընթացքում կամ ՀՀ վարչական դատարան՝ ՀՀ վարչական դատավարության օրենսգրքով սահմանված կարգով՝ երկամսյա ժամկետում:

Սույն որոշմամբ նշանակված տուգանքի վճարման հաշվեհամարն է. **900005024055' 50000 ՀՀ դրամ, նշել 30 կողք:**

ՀԱՐԱՎԱՅԻՆ ՄԱՔՍԱՏՈՒՆ-
ՎԱՐՉՈՒԹՅԱՆ ՊԵՏԻ ԺԹՊ



ԱՐՏԱՇԵՍ ՂԱՄԲԱՐՅԱՆ